



REPUBLIKA E SHQIPËRISË
MINISTRIA E BRENDSHME
AGJENCIA E MBIKËQYRJES POLICORE

Nr. 30/17 Prot.

Tiranë më, 02/08/2023

V E N D I M

Nr. 03 datë 02.08.2023

Trupa e Vlerësimit pranë Agjencisë së Mbikëqyrjes Policore, e përbërë nga:

Henri Naqellari **Kryesues**

Loreta Hanxhari **Relator**

Bora Vrenjo **Anëtar**

në datën 02.08.2023, në orën 10:15 në ambientet e Agjencisë së Mbikëqyrjes Policore, mori në shqyrtim mbi bazë dokumentesh, çështjen që i përket:

SUBJEKTI I VLERËSIMIT:

Znj.Nevila Cako Xoxa me funksion aktual Drejtor në Drejtorinë e Infstrukturës, në Departamentin, e Teknologjisë së Informacionit, në Drejtorinë e Përgjithshme të Policisë së Shtetit.

OBJEKTI:

Vlerësimi kalimtar i subjektit të vlerësimit.

BAZA LIGJORE:

Ligji nr. 12/2018 “Për Vlerësimin Kalimtar dhe Periodik të Punonjësve të Policisë së Shtetit, Gardës së Republikës, Shërbimit për Çështjet e Brendshme dhe Ankesat në Ministrinë e Brendshme”, i ndryshuar.

Ligji nr. 44/2015 “Kodi i Procedurave Administrative të Republikës së Shqipërisë”.

Ligji nr. 49/2012 “Për Organizimin dhe Funksionimin e Gjykatave Administrative dhe Gjykimin e Mosmarrëveshjeve Administrative”, i ndryshuar.

TRUPA E VLERËSIMIT TË AGJENCISË SË MBIKËQYRJES POLICORE,

pasi dëgjoji dhe vlerësoi shpjegimet dhe argumentimin ligjor të Relatorit të çështjes, Znj.Loreta Hanxhari, pasi shqyrtoi dhe analizoi çështjen në tërësi duke u bazuar në Ligjin 12/2018 të ndryshuar,

V Ë R E N:

I. RRETHANAT E ÇËSHTJES

1. Trupa e Vlerësimit të Agjencisë së Mbikëqyrjes Policore është organi kompetent që kryen procesin e vlerësimit kalimtar të punonjësve të Policisë së Shtetit, Gardës së Republikës dhe Shërbimit për Çështjet e Brendshme dhe Ankesat, bazuar në Ligjin nr.12/2018, “*Për Vlerësimin Kalimtar dhe Periodik të Punonjësve të Policisë së Shtetit, Gardës së Republikës, Shërbimit për Çështjet e Brendshme dhe Ankesat në Ministrinë e Brendshme*”, i ndryshuar.

2. Subjekti i vlerësimit kalimtar, Nevila Cako Xoxa ka dorëzuar *deklaratën e pasurisë, deklaratën e kontrollit të figurës dhe formularin e vlerësimit të aftësive profesionale*, për funksionin Drejtore e Drejtorisë së Teknologjisë së Informacionit në Departamentin për Shërbimet Mbështetëse pranë Drejtorisë së Përgjithshme të Policisë së Shtetit, sipas përcaktimeve të neneve 32 pika 2, 36 pika 1, dhe 44 pika 1, të Ligjit Nr.12/2018, “*Për Vlerësimin Kalimtar dhe Periodik të Punonjësve të Policisë së Shtetit, Gardës së Republikës, Shërbimit për Çështjet e Brendshme dhe Ankesat në Ministrinë e Brendshme*”, të ndryshuar.

3. Bazuar në Nenin 6 të Ligjit nr.12/2018 “*Për Vlerësimin Kalimtar dhe Periodik të Punonjësve të Policisë së Shtetit, Gardës së Republikës dhe Shërbimit për Çështjet e Brendshme dhe Ankesat në Ministrinë e Brendshme*”, i ndryshuar, Nevila Cako Xoxa ka qenë subjekt i vlerësimit kalimtar nga Agjencia e Mbikëqyrjes Policore, për shkak të funksionit Drejtore e Drejtorisë së Teknologjisë së Informacionit në Departamentin për Shërbimet Mbështetëse pranë Drejtorisë së Përgjithshme të Policisë së Shtetit.

4. Subjekti i vlerësimit, Nevila Xoxa, iu nënshtrua procedurës së shortimit, në shortin e zhvilluar në datën 05.04.2023, nga Agjencia e Mbikëqyrjes Policore, në përputhje me Udhëzimin e Ministrit të Brendshëm nr.07 datë 17.01.2023 “*Për Procedurat dhe Mënyrat e Hedhjes së Shortit për Trupat e Vlerësimit dhe Subjektet e Vlerësimit të Ligjit 12/2018, i ndryshuar*”. Sipas shortit të zhvilluar, Trupa e Vlerësimit përbëhet nga Z. Henri Naqellari (Kryesues); Znj.Loreta Hanxhari (Relatore) dhe Znj. Bora Vrenjo (Anëtare).

5. Në zbatim të legjislacionit në fuqi mbi parandalimin e konfliktit të interesit, u deklarua mospasja e konfliktit të interesit nga anëtarët e Trupës së Vlerësimit, sipas nenit 27, pika 1 të Ligjit nr.12/2018, i ndryshuar dhe neneve 30 dhe 31, të Kodit të Procedurave Administrative.

6. Trupa e Vlerësimit në përputhje me Ligjin 12/2018, të ndryshuar si edhe në bazë të Rregullores nr.197 dt.28.02.2023 “Për hapat proceduralë të unifikuar”, vendosi me Vendimin nr.01 datë 18.04.2023 fillimin e hetimit kryesisht për subjektin e vlerësimit Nevila Cako Xoxa si dhe të caktojë Kryesues të Trupës Vlerësuese Z. Henri Naqellari.

7. Relatori i çështjes, nëpërmjet komunikimit elektronik zyrtar të dates 18.04.2023, njoftoi subjektin e vlerësimit për fillimin e procesit të vlerësimit kalimtar duke i bërë të njohur përbërjen e Trupës së Vlerësimit dhe duke i kërkuar subjektit të vlerësimit të deklarojë nëse është në kushtet e konfliktit të interesit me anëtarët e trupës së vlerësimit.

8. Subjekti i vlerësimit ka dorëzuar pranë Agjencisë së Mbikëqyrjes Policore, “Deklaratën për Konfliktin e Interesit” me nr. *** prot. datë 24.04.2023, duke shprehur se nuk është në kushtet e konfliktit të interesit me asnjë nga anëtarët e trupës së vlerësimit.

9. Relatori i çështjes në përmbushje të detyrave ligjore të përcaktuara në pikën 3 të nenit 25, të Ligjit 12/2018, i ndryshuar, dhe sipas:

- nenit 7, pika 1 të Rregullores nr. 197 datë 23.02.2023 “Për hapat proceduralë të unifikuar”, nenit 4 të Marrëveshjes së Bashkëpunimit ndërmjet Agjencisë së Mbikëqyrjes Policore dhe Inspektoratit të Lartë të Deklarimit dhe Kontrollit të Pasurisë dhe Konfliktit të Interesit, ka dërguar me shkresën nr.*** prot., datë 19.04.2023, pranë ILDKPKI-së, formularin e deklarimit të pasurisë për vlerësimin kalimtar të dorëzuar nga subjekti i vlerësimit .
- nenit 7, pika 7 të Rregullores nr. 197 datë 23.02.2023 “Për hapat proceduralë të unifikuar”, ka dërguar me shkresën nr.*** prot., datë 19.04.2023, pranë DPPSH-së, formularin e aftësive profesionale për vlerësimin kalimtar të dorëzuar nga subjekti i vlerësimit.
- nenit 7, pika 4 të Rregullores nr. 197 datë 23.02.2023 “Për hapat proceduralë të unifikuar”, ka dërguar me shkresën nr.*** prot., datë 19.04.2023, pranë AMP-së, deklaratën e kontrollit të figurës për vlerësimin kalimtar të dorëzuar nga subjekti i vlerësimit.

10. Drejtorja e Përgjithshme e Policisë së Shtetit, me shkresë nr.*** prot., datë 06.07.2023, ka informuar Trupën e Vlerësimit pranë Agjencisë së Mbikëqyrjes Policore në lidhje me Urdhërin nr ***, datë 19.06.2023 “Për lirim nga Policia e Shtetit dhe emërimin në funksionet ndihmëse të një Punonjësi Policie”, nëpërmjet të cilit Znj.Nevila Xoxa, me detyrë Drejtoreshë e Drejtorisë së Teknologjisë së Informacionit në Departamentin për Shërbimet Mbështetëse pranë Drejtorisë së Përgjithshme të Policisë së Shtetit lirohet nga Policia e Shtetit dhe emërohet në funksione ndihmëse në detyrën Drejtoreshë në Drejtorinë e Infstrukturës, në Departamentin e Teknologjisë së Informacionit, në Drejtorinë e Përgjithshme të Policisë së Shtetit, me motivacionin "Për shkak të implementimit të strukturës së re organike dhe për ndryshim të statusit të funksionit".

11. Sipas kërkesës së Trupës Vlerësuese dërguar me shkresën nr.*** prot., datë 11.07.2023, DPPSH me shkresën e saj nr.*** prot., datë 18.07.2023, vuri në dispozicion të Trupës Vlerësuese edhe dokumentacionin si më poshtë:

- Urdhëri i Ministrit të Brendshëm nr.47, datë 14.04.2023, “Për miratimin e strukturës dhe të organikës në nivel qendror, vendor dhe strukturat e vecanta të Policisë së Shtetit”
- Organika e Drejtorisë së Përgjithshme të Policisë së Shtetit
- Organika e Departamentit për Teknologjinë e Informacionit

12. Në vijim Relatori i çështjes njoftoi për ndërprerje të procesit të hetimit administrativ për subjektin e vlerësimit Nevila Xoxa për komponentin pasuror, drejtuar ILDKPKI-së me shkresën nr.*** prot., datë 19.07.2023 dhe për komponentin e figurës drejtuar AMP-së me shkresën nr.*** prot., datë 19.07.2023, duke i kërkuar dhe dërgimin e formularëve përkatës të dorëzuar nga subjekti si dhe korespondencën institucionale me dokumentacionin shoqërues të hetimit të deritanishëm.

II. ARSYETIMI LIGJOR I TRUPËS SË VLERËSIMIT

13. Trupa e Vlerësimit, u njoh me rrethanat e çështjes, administroi edhe dokumentacionin si vijon:

- Urdhëri i Ministrit të Brendshëm nr.47, datë 14.04.2023, “Për miratimin e strukturës dhe të organikës në nivel qendror, vendor dhe strukturat e vecanta të Policisë së Shtetit”
- Organika e Drejtorisë së Përgjithshme të Policisë së Shtetit
- Organika e Departamentit për Teknologjinë e Informacionit
- Urdhëri i Drejtorit të Përgjithshëm të Policisë së Shtetit Nr.*** datë 19.06.2023 “Për lirim nga Policia e Shtetit dhe emërimin në funksionet ndihmëse të një Punonjësi Policie”.

14. Në zbatim të Ligjit nr. 12/2018 “Për Vlerësimin Kalimtar dhe Periodik të Punonjësve të Policisë së Shtetit, Gardës së Republikës dhe Shërbimit për Çështjet e Brendshme dhe Ankesat në Ministrinë e Brendshme”, i ndryshuar, sipas nenit 3, pika 18 e tij, “subjekt vlerësimi” janë punonjësit sipas përcaktimeve të bëra në pikat 15,16, e 17 të këtij neni.

15. Duke qënë se, subjekti i vlerësimit Znj.**Nevila Cako Xoxa**, për shkak të implementimit të strukturës së re organike dhe për ndryshim të statusit të funksionit, lirohet nga Policia e Shtetit dhe emërohet në funksionet ndihmëse, duke ndryshuar statusin e funksionit të saj nga **punonjës policie në punonjës administrativ**, Trupa Vlerësuese konstaton se Znj. Nevila Cako Xoxa nuk është më subjekt vlerësimi sipas Ligjit të Vlerësimit.

16. Në këto kushte, Trupa Vlerësuese deklaron të përfunduar çështjen e hetimit administrativ të nisur ndaj subjektit të vlerësimit, pa një vendim përfundimtar për shkak se interesi, qëllimi dhe objekti për të cilin ka nisur procedura janë bërë ligjërisht të pamundur, duke konstatuar se ndodhet në kushtet e zbatimit të nenit 95 të Kodit të Procedurës Administrative.

PËR KËTO ARSYE

Trupa e Vlerësimit pranë Agjencisë së Mbikëqyrjes Policore, mbështetur në Ligjin Nr. 12/2018 “Për Vlerësimin Kalimtar dhe Periodik të Punonjësve të Policisë së Shtetit, Gardës së Republikës, Shërbimit për Çështjet e Brendshme dhe Ankesat në Ministrinë e Brendshme”, i ndryshuar si dhe në nenin 95 të Kodit të Procedurave Administrative të Republikës së Shqipërisë;

V E N D O S I:

1. Ndërprerjen e procesit të vlerësimit kalimtar të subjektit të vlerësimit **Nevila Cako Xoxa** me funksion Drejtor në Drejtorinë e Infstrukturës, në Departamentin e Teknologjisë së Informacionit, në Drejtorinë e Përgjithshme të Policisë së Shtetit pa një vendim përfundimtar.
2. Vendimi i arsyetuar me shkrim u njoftohet Subjektit të Vlerësimit si edhe Institucionit brenda 15 ditëve nga dita e nesërme e shpalljes së Vendimit.
3. Ky vendim publikohet në faqen zyrtare të Agjencisë së Mbikëqyrjes Policore, në përputhje me pikën 8, të nenit 56, të Ligjit 12/2018, i ndryshuar.
4. Kundër këtij vendimi lejohet ankim brenda 45 ditëve nga data e njoftimit, në Gjykatën Administrative të Shkallës së Parë Tiranë.

Ky vendim u shpall sot datë 02.08.2023, në Tiranë.

TRUPA E VLERËSIMIT

Henri Naqellari
Kryesues

Loreta Hanxhari
Relator

Bora Vrenjo
Anëtar